

Na osnovu člana 18. i člana 19. stav (2) Zakona o Vladi Federaciji BiH („Službene novine Federacije BiH“, broj: 1/94, 8/95, 58/02, 19/03, 2/06 i 8/06), Vlada FBiH je na svojoj __ sjednici održanoj _____ donijela:

ODLUKU

o formiranju Koordinacionog tijela za parafiskalne namete u FBiH

Član 1.

Formira se Koordinaciono tijelo za parafiskalne namete u Federaciji BiH u sljedećem sastavu:

- 1.** Jedan predstavnik kojeg predlaže premijer Vlade FBiH
- 2.** Jedan predstavnik kojeg predlaže Ministarstvo finansija FBiH
- 3.** Jedan predstavnik kojeg predlaže Udruženje poslodavaca FBiH.

Član 2.

Nadležnosti Koordinacionog tijela:

- Ispitati opravdanost postojećih parafiskalnih nameta na nivou FBiH i predložiti njihovu racionalizaciju/ukidanje
- Davanje mišljenja na prijedloge nadležnih organa za uvođenje parafiskalnih nameta na nivou FBiH
- Dostavljanje prijedloga Ministarstvu finansija FBiH za ažuriranje Registra parafiskalnih nameta na nivou FBiH
- Učešće u izradi zakona o parafiskalnim nametima i analizi njegove primjene.

Član 3.

Koordinaciono tijelo će se sastajati najmanje jednom mjesečno.

Sastankom će predsjedavati predstavnik Ministarstva finansija FBiH.

Član 4.

Aktivnosti Koordinacionog tijela će se vršiti shodno sljedećim principima:

- Zakonitosti
- Pravičnog utvrđivanja osnovice
- Pravičnog utvrđivanja poreznog obaveznika
- Postojanja protuusluge i ekvivalentnosti
- Pojednostavljenja plaćanja i konsolidacije više naknada u jednu
- Održivosti javnih prihoda: nadomještanje izgubljenog prihoda, namjensko trošenje sredstava i princip racionalnosti naplate.

Član 5.

Vlada FBiH će u roku od sedam dana nakon stupanja na snagu ove odluke donijeti Rješenje o imenovanju članova Koordinacionog tijela za parafiskalne namete na prijedlog institucija iz člana 1. ove odluke.

Član 6.

Ova odluka stupa na snagu danom donošenja i objavit će se u „Službenim novinama Federacije BiH“.

OBRAZLOŽENJE ZA DONOŠENJE ODLUKE O FORMIRANJU KOORDINACIONOG TIJELA ZA PARAFISKALNE NAMETE U FBIH

Svjedoci smo da je privatni sektor, osim velikog opterećenja rada koje je u FBiH najveće u Evropi, opterećen i visokim porezima i raznim parafiskalnim nametima.

Veliki broj parafiskalnih nameta ima negativan utjecaj, jer je to jedno nevidljivo opterećenje koje znatno utječe na smanjenu konkurentnost domaće privrede.

Smanjenjem i ukidanjem parafiskalnih nameta stvorili bi se povoljniji uvjeti za poslovanje bh. privrednika, a samim tim i za izgradnju povoljnijeg poslovnog ambijenta. Također, ubrzao bi se ekonomski rast i razvoj države, smanjila siva ekonomija, povećala zaposlenost i privukli strani investitori. Naglasit ćemo da Bosna i Hercegovina ima tri puta više parafiskalnih nameta nego Srbija, a dva puta više nego Hrvatska.

Vlada FBiH je po pitanju parafiskalnih nameta načinila prvi značajan korak. U saradnji sa USAID-om sačinjen je Registar parafiskalnih nameta, ali se na racionalizaciji parafiskalnih nameta ništa nije učinilo.

Premijer Vlade FBiH, svojim dopisom od 13.02.2017. godine i ministrica finansija, svojim dopisom od 11.04.2017. godine, pozvali su UPFBiH da se uključi u aktivnost na identifikaciji parafiskalnih nameta i „eliminisanje ili smanjenje visine nekih od njih“.

UPFBiH je odmah reagovalo i prosljedilo devet takvih nameta uz prijedlog za njihovo ukidanje, sa detaljnim obrazloženjima. Budući da se oni nalaze u nadležnosti šest ministarstava, naš prijedlog im je prosljeđen od strane kabineta premijera Vlade FBiH, ali bez rezultata, uz obrazloženja da se na tome radi, da će se razmotriti naš prijedlog, da se ne mogu ukinuti, da je to obaveza po Direktivama EU itd.

Ukinuta su samo dva koja su se nalazila u nadležnosti Federalnog ministarstva trgovine. Ministar i njegovi saradnici su prihvatili da sa nama direktno rade na tom problemu, što je rezultiralo njihovim ukidanjem.

Također, djelimično smo analizirali Registar parafiskalnih nameta i u sedam zakona, po osnovu kojih u registru postoji 18 parafiskalnih nameta, mi smo našli još dodatna 44. Niko nije reagovao niti dopunio spisak.

To pokazuje neophodnost za formiranje koordinacionog tijela koje bi radilo na ukidanju i smanjenju postojećih parafiskalnih nameta na nivou FBiH, davalo mišljenje na prijedloge nadležnih organa za uvođenje novih parafiskalnih nameta na nivou FBiH, te dostavljalo prijedloge Ministarstvu finansija FBiH za ažuriranje Registra parafiskalnih nameta na nivou FBiH.

Shodno navedenom, predlažemo da Vlada FBiH donese Odluku o formiranju Koordinacionog tijela za parafiskalne namete u FBiH.